

25. marts 2014

UPA 2014/129
Doris Jakobsen

**Siunnersuut uunga: Kalaallit Nunaata Aatsitassarsiornermi Aningaasaateqarfia pillugu Inatsisartut inatsisaata allanngortinnissaa pillugu nr. 6 5. december 2008-imeersoq Inatsisartut inatsisaat nr. xx, xx.xxxx-imeersoq.
(Inuussutissarsiornermut Aatsitassanullu Naalakkersuisoq)**

Politikkikkut siunertaavoq aatsitassarsiornermi aningaasaateqarfiup ukiuni arlalinni iluanaarutiniq immerneqarnissaa, qulakkeerniarlugu aalajaatsumik nunatta aningaasaqalernissaa aammalu inuaqatigiit ineriartornerat ataqatigiissoq pilersinniarlugu, aammattaaq siunertaavoq aatsitassarsiornermik suliffissuaqarnermi, aningaasaqarnikkut inuussutissarsiornikkullu arlalinnik tunngaveqalernissaaq soorlu pisinnaasanik annertusaaneq aqqu-tigalugu. Taamaammat aatsitassarsiornermit iluanaarutit ukiut arlallit katersorneqarnissaaq aningaasaateqarfimmillu pilersitsineq isumatusaarnerussaaq.

Taamatut ineriartortitsineq Norgemi iluatsilluarnikuusooq ilisimavarput, kingunerisaanik suliffeqarfissuarmik piginneqataalerneq anguneqarnikuulluni. Assigusumik ingerlatsisoqarnissaa nunatsinni maligassaqqippoq, kissaatiginanngimmat siunissaaq ungasinnerusoq eqqarsaatigalugu Danmarkisut ileqqaagaqanngitsoornissarput.

Siunnersuut una 2013 ukiaanerani saqqummiunneqaaqqaarpoq. Maannakkut Naalakkersuisut saqqummiussissutaanni, ersarissumik oqaatigineqarpoq Naalakkersuisut siunnersuutip ajoqtissartarisinnaasaasa annertuut imaluunniit isumaliornartortaqtartut ammasumik saqqummiunnissaannut Naalakkersuisut akisussaaffeqartut pisussaaffeqarlutillu, soorlu uaguttaaq Inatsisartuni ilaasortat taamatut pisussaaffeqartugut.

Aatsitassarsiornermi suliat pigisat nalillit tamaasa ilanngullugit aningaasaateqarfimmut innersuunneqartalissappata Naalakkersuisut saqqummiussissutaanni oqaatigineqarpoq, nunatta aningaasaqarneranut kingunerloriaannaasoq, tassalu aatsitassarsiornermi aningaasaateqarfimmi taamaaqataanik nalilinnik inerisaasoqarani, aammalu Namminersorlutik Oqartussat aningaasartuutaat taamaaqataanik annikillineqaratik, ukiumoortumik danskit naalagaaffiannit Namminersorlutik Oqartussanut ataatsimoortumik tapiissutit annikillisinneqarnerannik siunnersuut malitseqarsinnaasoq. Siumumiit tamanna orniginartingilarput taamaattumillu siunnersuut taamatut isikkoqartillugu itigartinneqarnissaa innersuussutigivarput.